

Lunedì 8 giugno 2015  
ore 18,00

## **IL CANTO DI PROTESTA NELLA POESIA DIALETTALE**

a cura di Ciccio De Rose

con lettura di testi da parte dei soci

introdurrà il Presidente Mario Iazzolino

*Dallo Statuto dell'Associazione*

*L'Associazione ... persegue esclusivamente finalità culturali.*

*Le finalità dell'Associazione sono:*

- difendere la tradizione linguistica dialettale dell'area cosentina
- ricercarne le radici e raccogliere materiale linguistico inerente
- diffondere opere dialettali di sicuro valore.

sito dell'associazione [www.i13canali.it](http://www.i13canali.it)

Via Camposano, 41 (ex Via De Rada) - 87100 Cosenza tel.0984.795065 -

## **PROGRAMMA**

**Gli Ignudi**  
*di Giuseppe Monaldo*  
legge Luigi Speciale

**Pregghiera del calabrese  
contro i Piemontesi nel 1874**  
*di Antonio Martino*  
legge Franco Calomino

**'A cartella d'u fucatu**  
*di Ettore Feraco*  
legge Sergio Chiatto

**Littira allu Patretiernu**  
*di Mastro Bruno Pelaggi*  
legge Gregorio Vigliadoro

**Littera a Mbertu Primu**  
*di Mastro Bruno Pelaggi*  
legge Gregorio Vigliadoro

**Nuova Yorka**  
*di Domenico Adamo*  
legge Vito Scrivano

**Lu ritornu**  
*di Micu Pelle*  
legge Angelo Severino

**Canto d'i minaturi**  
*di Ciccio De Rose*  
legge Ciccio De Rose

**Matri chi mannati li figghi**  
*di Ignazio Buttitta*  
legge Ciccio De Rose

**Calavrisi nun stati 'ncacanati**  
*di Ciccio De Rose*  
legge Franco Calomino

**Calavrisi, jettati la sarma**  
*di Michele De Marco*  
legge Tonino Martire

## GLI IGNUDI

*di Giuseppe Monaldo*

Varvi de zimmari  
galiuoti tristi  
hiuri de lazzari  
de camorristi .  
priestu la cammara  
sgumbratinila  
na tana ahhjativi  
dintra la Sila...  
cu quale stomacu  
mò v'appropiati  
lu bellu tituli  
di Deputati ?  
Si , granni e picciuli  
gridanu pari :  
li lupi misimu  
ppi pecurari !  
Vui all'Italia ,  
o mamma mia ,  
la darrupastivu  
mienzu la via  
non ci dassastivu  
na cammiseja ,  
na pezza vecchia ,  
na cuverteja .  
quantu mentistivu  
de tassi e pisu  
o lupi pampini  
facci de 'mpisu .  
e mo cumprastivu  
villi e casini  
e fati tavuli  
di principini.

O lupi pampini  
lupi de vranca  
chi ni facistivu  
de chjja banca ?  
Gridandu Patria  
e Libertà  
vi la cumprastivu  
senza pietà .  
Chini de debiti  
jstivu a Roma  
chimmu nu furmini  
chimmu v'àjhuma .  
Ed è possibili  
sempri mu dura  
sa santa cavula  
de mangiatura ?  
O lupi pampini  
de cinqu miggia  
male ntra l'unghia  
chimmu vi pigghia .  
Però la storia  
'o nuomu vostru  
mente na macchia  
de bruttu 'nchiostru  
chi nun si caccia  
cu sapunati  
ne cu la cinnara  
di li vucati  
Paroli inutili  
vanu lamentu  
unguentu all'ernia  
scaffi a lu ventu !

**LA PREGHIERA DEL CALABRESE AL  
PADRETERNO CONTRO I PIEMONTESE,  
NEL 1874**

di Antonio Martino

Signuri, chi dormendu vigilati  
e tutti li segreti canusciti,  
chi senza testimoni giudicati  
e peni e premi, tardu, compartiti,  
chi siti vecchiarèdhu e nun trimati,  
eternu sempr 'in cielu e nun muriti,  
ssi pili, 'ntra s'arricchi mu sciuppati  
è tempu , e li preghieri mu sentiti:  
lu vostru Cristu e tutti li cristiani  
su' mpaticati di li porci e cani.

.....  
Calaru di Piemundi allindicati,  
na razza chi mangiava dha pulenti  
e di Natali e Pasca dui patati.  
lestimaturi orrendi e miscredenti  
e facci tosti e latrì cedulati,  
superbi, disprezzanti, impertinenti,  
sèdinu all'umbra e fannu tavulati  
cu li suduri chi jettamu ardenti  
e di li fundi nostri cilunari  
nui diventammu, ed idhi propetari.

.....  
Guardaru n'mprima misa l'olivari,  
l'agrumi, li vigneti e mandri e frutti,  
e dissaru fra lori : " 'Nce di fari!...  
Cca n'c'è di beni mu 'ngrassamu tutti".  
E subito si misaru a scialari  
a schiatta panza, ad alleggiari gutti,  
poi dazi senza fini a mmunzedhari  
pe comu s'ammunzedha ligna rutti,  
e pe di cchiù li "schiavi conquistati"  
'ndi chiamanu, li facci d'ammazzati.

Già li famigghi ricchi 'mpezzentiru,  
li povari su sicchi pe la fami,

l'argentu e l'oru tuttu lu periru,  
e scumpariu di nui finna la rami.  
L'impieghi fra di loru si spartiru,  
ficiaru schiananzia di lu bestiame:  
gadhini ed ova e pasta l'incariru,  
lu ranu, vinu, pisci e la fogghiami.  
Non pensan' autru ch'a mangiari sulu:  
mu fannu bonu chippu e grossu culu.

.....  
Signuri, vui 'nci siti e nui cridimu,  
e sutta stu fragellu v'adoramu,  
peccati cu li sarmi, sì, nd'avimu,  
ma sempri a vui fideli e stritti stamu.  
Diciassett'anni sugnu chi ciangimu,  
li pani cu li gràlimi ammogghiamu  
e tra singhiuzzu e chiantu l'agghiuttimu:  
cercamu a vui succursu e peju jamu.  
Suffritimi, Signuri, nu momentu,  
mu sfocu di stu cori lu tormentu.

Sapiti ca vi simu crijaturi,  
perciò vi parlu francu, in cunfidenza:  
simu arrustuti e ammenzu a li duluri  
perdimmu lu curduni e la pacenza.  
Non promentiti vui 'ntra la Scrittura  
ca siti occhiu amurusu e pruvidenza  
pe cui vi servi, e di li peccaturi  
ca fati mu si perda la simenza?...  
Vi chiamu e a la palora, non mancati,  
ca siti via diritta e veritati.

Lu furmini, lu tronu, 'ntra su pugno,  
su l'armi vostri di l'eternitati;  
lu caddu di giugnettu, agustu e giugno,  
la nivi di dicembri dominati;  
tempesti e lu levanti di lu 'ncugnu  
non siti vui chi spissu li mandati?...  
Cannuna e baionetti chi mai sugnu,  
rimpettu a sa tremenda maiestati?...  
Ebbeni mu struggiti chi 'nci voli  
si figghi di puttana, si marioli?

## **'A CARTELLA D'U FUCATU**

*di Ettore Feraco*

**“ Truonu de l'aria le putisse jire  
e cinnara li fazzi purverata !  
Chi d'u male d'a formica vvo murire  
chi ppe prima ci ha misu la pinnata !**

**E chillu chi se pigliu de li gienti  
a medici l'appizzi ed a speziali  
a tavuti , a cannili e sacramenti ,  
a campani a murtuori e a funerali !**

**Le vo jjire 'nu male alli stintina  
e de notte malifica nuvella  
ch'u sangu loru jissidi a lavina  
le carni strozza strozza a 'na tinella**

**Spezzuniati li portinu ncannizza ,  
adugna adugna fatti ed a pitazza ;  
adacciati a pasta di sazizza ,  
si sradicasse chissa mala razza !**

**Cuviernu puorcu , latru e camburrista  
chi ne colle de tasse e de pisuni ,  
ohi chi pote perdere la vista  
chillu chi dice male 'e Re Burbune !**

**Chillu cuviernu armenu avia ricchezza  
e nun scurciava a nue li povarielli**

**ch'eramu sempre ngaviu e cuntentizza  
e nun aviamu tutti sti fardielli !**

**Mo è venutu Vittorio Mmanuele  
chi porta ppe spalluzzu a Carrubardu  
e ne suche lu sangu cu lu fele  
e ne tira alla 'nzunza ccu lu lardu ! “**

## LITTIRA ALLU PATRITIERNU

*di Mastru Brunu*

Non vidi, o Patritiernu,  
lu mundu `mu sdarrupi,  
ch'è abitatu di lupi  
e piscicani!

Priestu, mina li mani,  
vidi cuom'hai `mu fai,  
cacciandi di `sti guai,  
manneji'aguannu!

Non vidi ca `ndi fannu  
muriri a puocu a puocu?  
Tu ti mintisti juocu  
e stai `mu guardi?

Cchiù ca simu futtuti  
essiri non putimu.  
fuss'armenu m'aviamu  
pani asciuttu!

Li previti hannu tuttu,  
è china la dispensa,  
li ricchi vannu a menza  
e nnui... `nu cazzu!

Io mo' pinzai `mu fazzu  
lu stuortu cu ttia puru,  
ca Tu si assai cchiù duru  
di `nu scuogghiu!

Si bbue `mu ndi vidiimu  
scinda pi cchijia via  
ca ja mi `ncuntri a mmia  
e tti dicu tuttu,

ca io mi ndi strafuttu,  
dicu la vierità,  
ca io a Sua Maistà  
puru nci scrissi.,

Tu chi ssi onnipotenti,  
giudici di giustizzia,  
lu cchiù cull'avarizia  
ha"mu nci pienzi!

Hai `mu cacci sintienzi  
`mu trema cíelu e terra,  
hai `mu li fai conserva  
a st'assassini!

Speciarmenti chist'annu  
chi llu pani va ccaru,  
lu boia di l'avaru  
cuomu `ngrassa!

Prima ca l'annu passa  
penzaci Tu, Signuri,  
ca si nno' li maturi  
amari nui!

Io chi ti dicu cchíui?  
A nnui ndi scuorticarù  
li prèviti, l'avaru  
e lu Guviernu.

Tu ndi mandi allu `Mpiernu?  
Ndi fai n'atru piaciri,  
nd'arrusti cuomu agghiri  
alla gravigghia,

urtima meravìghia  
ed unicu ristuoru  
per omnia secula  
seculoru!!!

## LITTERA A MBERTU PRIMU

*di Mastru Brunu*

Di supa a' sta muntagna  
ti jiettu `na gridata,  
sientila `sta chiamata  
ed èjia priestu!

No' mi fari `mu riestu  
futtutu di lu tuttu,  
ca sai quant'èsti bruttu  
l'aspittari?

Nè rrobba nè dinari  
truovi alla casa mia,  
perciò ricurru a ttia  
si bbue mu senti.

`Sti vuci e `sti lamienti,  
tsti pianti e `sti suspiri  
toccali, si non cridi,  
culli mani;

Vidi cuom'è la fami  
ca pue mi cridi a minia  
e vidi s'è buggia  
quantu ti dicu.

Duna a ccu' vue l'arrustu,  
lu miegghiu e lu cchiù gruossu,  
a nnui dunandi `n'uossu,  
cuomu cani.

Sempi lavuru e ppani  
circau lu calabrisi,  
Tu ti sciali d'arrisi  
e cugghiuniji.

Apira l'uocchi e bbidi,  
jetta'nu sguardu'ntuornu,

vidi ca mai fa juornu  
e semp'è scuru;

apira corchi lavuru  
mu'nd'abbuscamu pani,  
ca la morti di fami  
è truoppu cruda!

Mo chi cazzu mi'mpignu  
'mu pagu la fundiaria  
si la casa mi para  
'nu spitali?

'Nu liettu e'nnu rinali  
'na seggia e'nnu vrasceri.. .  
quandu vena l'ascieri  
pigghia cazzi!!!

È miégghiu 'mu 'nd'ammazzi  
ch'è miegghiu 'mu murimu!  
Chi cazzu lu vulimu  
'stu campari?

Non putimu truvare  
'nu jornu di lavuru,  
sempi simu allu scuru  
e senza pani.

Basta!... "*Simu'taliani!*"  
gridamma lu sissanta  
e mo' ...avogghia 'mu canta  
la cicala!

La fami culla pala  
si pigghia e culla zzappa;  
cu' pota si'ndi scappa  
a Novajorca.

.....

## NOVA YORKA

di Domenico Adamo

Chista, chiamata la Città Gigante  
è lu riciettu de la mala gente,  
cca chine arrubba goda e fa 'u galante  
e chine è onestu nu' tena mai nente,  
ma la marvaggità de l'autri cunta  
e de la sorta se lamenta, e canta.  
Vinnaru gente de tutti li punti  
cumu figli de cani tutti quanti  
ma quandu a puertu sarvi fueru junti  
chi lupu diventaudi e chi brigante.  
Sulu l'uomini onesti e li 'nnucienti  
fueru custritti a fare i mendicanti.  
Chistu è lu paradisu de 'u furfante  
chi u' da' cuscienza nè vrigogna sente ;  
oje se crida d'essere regnante  
e vorra diventare 'nniputente  
'nsina chi n'autru piscicane spunta  
e cuemu sarda 'ncuerpu si lu chianta.  
E a guardare sta lotta dulente  
la gente crida: è cosa 'ntiessante  
pocu 'mporta chi vince o chi va a l'untu  
lu perditure è sempre lu spettante.  
Ccu mille 'nganni se gabba la gente  
chi vo 'ngannare trova lu 'nnuciente.  
Chista è la civirtà chi ccà s'avanta;  
la civirtà de u nuovu cuntinente,  
oru e ricchizza sulamente cunta  
e tutte le virtù nu v'anu nente.  
Cca se fatiga e la vita se stenta  
pe arricchire a chine ne turmenta.

## LU RITORNU

di Micu Pelle

“Litteratu” no mmi pozzu diri,  
pe pinna ebbi l’aratra e lu picuni,  
pe scola, la campagna e lu canteri,  
l’oman’anziani li me’ professori.

Girai l’Italia e fora di confini  
sordatu, partigianu e prigionieri,  
girai lu mundu e vitti boni e mali  
cu sta faccenda di la migrazioni.  
Girai mineri, campi ed officini  
e mijara di cori scandaghjiai.  
Vitti machini, navi ed aeroplani  
ma quasi sempr’appedi caminai.

Gir’e vvai, gir’e vvai  
nta lu novu porfafoju  
sordi no ndi misi mai.

Tornai nta sta Calabria bell’e cara  
ma trovai li cosi cchiù pejiu di prima.  
Na vota li povaredi a lu portoni  
Du “Signurinu” e cu barritt’e mani,  
mo, avanti a porta du collocatori  
s’a la fatiga li voli mandari.  
Idu si vota cu modi gentili...  
“P’oji nenti...tornati domani...!”

Gir’e vvai, gir’e vvai  
quandu torn’a la casa  
senza pani, sugnu guai.

Ma quando ven’u tempu di lezioni,  
cu’ ti chiama cuginu e cu’ compari,

cu’ ti prometti u postu di fatturi,  
cu’ di guardianu o di capucantuneri,  
“S’o Parlamentu mi faciti jiri,  
di ccà fazzu la Città du Suli,  
fabbrichi, ferrovii, funtani e scoli,  
vojia mu ndaviti i lavurari”

Gir’e vvai, gir’e vvai  
cu chiacchieri e promisi  
a buggia no nsi jinchi mai.

Ma passata la festa e finiti li spari,  
bonanotti e grazi e sonaturi...  
cu’ fu cchiù sbertu e s’abbuscau u  
fumari,  
cu’ no, seguita a cjiri muzzuni.  
E’ no mi vindu pe’ pasta o pe dinari,  
voghjiu mu campu cu li me’ suduri,  
cercu i me’ diritti e m’i li ndannu a  
dari  
sinnò m’i cu d’attri maneri.

Gir’e vvai, gir’e vvai  
Ccà...si no ndi risbijiamu  
sta storia no mfinisci mai.

Ma si volimu li cosi cangiari  
ndavimu mu cumattimu tutti nsemi  
cuntr’a li Tiranni e li Ruffiani  
cuntr’a li Mbrogghiuni e Sfruttatori...  
pe’ na società di Giusti e di Uguali,  
di paci, di Libertati e veru...Amuri.



## CANTU 'I MINATURI

*( Strapuòrtu 'ncalavrisi de " Il Canto dei minatori " di Mario Rapisardi )*

Jettàti sutta 'na timpa  
Dintr'u gelu d'i vaddrùni ,  
Dintra puzzi curmi 'i tampa ,  
Caminamu a grancicùni ,

Nua , orvicati du munnu ,  
Picuniamu ppi vua lundruni ,  
Nua , ppi vua , civi 'i cunnu ,  
Nun simu carni , simu strazzuni .

Patruni , stirpigna 'i gramali ,  
Ricchizza d'a terra cacciamu ,  
Scavannu , cumu vrancu d'animali ,  
Mitallu lucente purtamù ;

Ppi vua terra vistuta 'i juri ,  
Ciambotte , tiatri e balli ,  
Cangiàti amuri , nissunu unuri ,  
Faciti i belli , muntàti cavalli ;

Senza journu , simu cecàti ,  
D'amuri nun sapimu biddrizza ,  
Stuortu guardàti , unn'ì parràti ,  
Mai 'nu risu , mai 'na carizza .

Nun simu sangu ? Allora Cristu ,  
Picchì 'ni torcia , picchì 'ni  
cunnanna ?  
Picchì Diu ccu 'nua è tristu ,  
E 'nvivienza 'nfiernu 'ni manna ?

Scippuniamu ppi l'eternu  
Aria lorda jatamu ,  
Vrashi 'ni duna 'u Patreternu :  
'Ngrignàti 'a favuci aspittamu .

Scavamu 'i stintini d'a terra ,  
A nua spriegiu e duluri ;  
'Nsina c'a l'uocchiu si 'nserra ,  
Ricugliti sangu d'u maccaturi .

Arrussicativi fierri , sc-cattati  
vurcani ,  
'Ngiegni arruzzàti alluccàti ,  
Rummàti tràngani , cugnàti picuni ;  
Sc-camannu 'a sipertura  
spampuliatu .

L'ura è vinuta ! Nua , 'mmerdusi ,  
A vua , furzuti , 'ni mintimu avanti ;  
Nua , ciurma 'i vasci fitusi ,  
Nissuna paura 'i vua giganti .

Jaccamu terra miticulusa ,  
Catasca d'oru l'arrubamu ;  
Ma vua viziusi e chiuritusi  
Spincìti zimeca e vi civàmu .

Ppi vua sacchettàti 'i petri ,  
'I fimmini nostri 'nfettàti ;  
A nua fierru e catina a metri  
Simu 'mpustàti , simu carcerati .

Sengri , nasiàti , scippamu cravùni ,  
Vua luminèra attizzati , ossa  
scarfàti ,  
Spiculàti , scangiàti , siti fricùni ,  
Nua allignati , simu dannati .

'I muntagna facimu sciollu ,  
Ppi nua trempa 'nfucata ;  
Marmu ppi l'eroi mancu 'n'ugnilla  
Si 'ni caccianu pani , posta 'mpucàti  
.

**Smicciàti , avimu finizza ,  
Tinti 'i furca , bifurchi 'i fogna :  
Ccu vua , panzùti curmi 'i ricchizza ,  
Vulimu 'ntruzzàri , unn'aviti vrigogna**

**: 'U lavuru salutamu , accucchiati ,  
'Ntruzzamu ppi 'na justa tabella ,**

**Nua 'ncamàti , vua disunurati ,  
Datìni abbientu , sderràti 'a cella .**

**Annascati e liusi ca simu lanzùni  
D'i zinzuli nuostri mussu sturtiàti ,  
Muorzu tuostu ppi nua tardùni  
Dispriegiu mannàti , 'ni jestimàti .**

**Sbafanti , cchiu nun grirati ?  
Sangu vivimu , fuocu jettàmu :  
Tinitivi 'i stozzi , nun vi sarvàti ,  
Vi 'mpicamu , 'u munnu cangiàmu !!**

## **MATRI CHI MANNATI LI FIGGHI**

*Di Ignazio Buttitta*

**Matri chi mannati li figghi  
a la surfara iu vi dumannu  
pirchè a li vostri figghi  
ci faciti l'occhi si nun ponnu vidiri lu jornu?**

**Pirchè ci faciti li pedi  
si camminunu a grancicuni?  
Nun li mannati a la surfara  
si pani un nn'aviti  
scippativi na minna  
un pezzu di mascidda pi saziali**

**disiddiraticci la morti chiuttostu  
megghiu un mortu mmennzu la casa  
stinnicchiatu supra un linzolu  
arripizzatu ca lu putiti chianciri  
e staricci vicinu.**

**Megghiu un mortu cunzatu  
supra lu lettu puvireddu  
di la vostra casa  
cu la genti ca veni a vidillu  
e si leva la coppula  
mentri trasi.**

**Megghiu un mortu dintra  
ca vrudicatu sutta la surfara  
cu vuatri supra dda terra a chianciri  
a raspari cu l'ugna  
a manciarivi li petri  
a sintiri lu lamentu  
e nun putiricci livari  
di ncoddu li petri  
chi lu scafazzanu**

**Facitili di surfaru li figghi!**

**CALAVRISI , NUN STATI 'NCACANATI**

*Di Ciccio De Rose*

Calavrisi , nun stati  
'ncacanati ,  
'a catreja addirizzati  
ognedunu ca vi passa  
avanti ,  
'u viditi 'ranni cumu  
giganti...!

Calavrisi , nun stati  
'ncacanati ,  
'a catreja addirizzati  
nun stati a 'na rasa  
ammunzeddrati ,  
muvitivi e maniche  
'mbazati...!

Calavrisi , nun stati  
'ncacanati ,  
'a catreja addirizzati  
'si fuocu di minnitta  
unn'attizzati ,  
cumu chiachielli viniti  
cummannati...!

Calavrisi , nun stati  
'ncacanati ,  
'a catreja addirizzati  
pigliati pichi , pale e  
furcuni ,  
surchi funni faciti di  
patruni...!

Calavrisi , nun stati  
'ncacanati ,  
'a catreja addirizzati  
orvicati guappu pitignu  
mafiusu

ca d'a terra nostra à  
fattu abbusu...!

Calavrisi , nun stati  
'ncacanati ,  
'a catreja addirizzati  
jettati d'a vucca pippa  
'ntartarata ,  
dati lustru a 'na bbona  
jurnata...!

...'si 'u figliu dumani  
trova muri ,  
nun dicìti ca pruvati  
duluri :  
siti stati mali  
fravicaturi...!!!

## CALAVRISI, JETTATI LA SARMA

*di Michele De Marco (Ciardullo)*

Calavrisi, jettati la sarma,  
finarmente ca l'ura è venuta,  
e lu focu sbampati de l'arma,  
ca vidimu s'ancunu la stuta!

E ssu focu verace e cucente  
sutta cinnera troppu è restatu...  
Quantu gustu àmu dato alla gente  
ca nue stessi l'avimu orvicatu.

Nn'au pigliatu ppe muorti lamati,  
ppe sumari de mbastu e capizza,  
povarielli, e se su mberverati  
ppe ni dare salute e ricchezza...

A nue...turdi, pezzienti, uocchi chiusi,  
ntra ssa terra de santa ciotia...  
su calati, sanguette, piatusi,  
a nne dare na luce, na via..

E ni l'amu truvati a ogni spangu  
de sa terra, ccu l'ugne alla manu...  
quannu, quannu ve zumpa lu sangu?  
Qannu, quannu ve friju le manu?

E cchi fò? Nni l'avimu scurdatu  
de cchi guappu pitignu nascimu?  
E mo simu redutti allu statu  
chi 'un so chine ne zampa lu primu!

S'âru fattu lu paru e lu sparù  
ed âu dittu <L'avimu de sutta>  
nn'âu cunzatu chi l'ossa nne paru  
puru l'aria la vorranu tutta!

Ma daveru – teniti le rise –  
(si de ridere aviti guliù)  
ma daveru ca lu giargianise  
c'â tri sordi si crida nu Diu!

Pecchì tena la manu alla pasta  
lu cuvernu lu fa galliare;  
su na cricca! ....Ogne cosa se guasta  
e se guasta...cà s'ha de guastare!

Giargianisi, ve dicu : Ssa vota  
nun ve rescia nnè prima, nnè pue!  
Si la cricca nne mina a la sbota,  
Calavrisi, pensamuce nue!

Calavrisi, jettati la sarma!  
A ss'agliutti chiudimo le porte,  
e ccu core tranquillu, ccu carma,  
tra nue tutti ligamune forte.

Si la Sila te jetta na vuce  
de lu mare se levanu l'unne,  
Ruventinu lu vientu sue duce  
move e, forte, Asprumunte rispunne.

Si nue, 'nsiemi ligati, scurdannu  
certi nciarmi, ch'attizzanu forte  
ccu na lena, nu mpignu, n'affannu,  
chilli cani, acquattati alle porte,

sulu e sempre teniennu alla mente  
nu penzieru surtantu nchiovato  
si rumpimu nue, nue sulamente,  
chilla corda cchi nn'â mpasturatu,

e si sbampa cucente ntra l'arma  
chillu focu, ssa vota è frunuta!  
Calavrisi, jettati la sarma,  
finarmente, ca l'ura è venuta.